

SIARAN MEDIA

Kuala Lumpur, 29 Jun 2021

Khazanah lantik Dato' Amirul Feisal Wan Zahir sebagai Pengarah Urusan

Khazanah Nasional Berhad (“Khazanah”) dengan sukacitanya mengumumkan pelantikan Dato’ Amirul Feisal Wan Zahir sebagai Pengarah Urusan berkuat kuasa pada 16 Julai 2021. Beliau bakal menggantikan Datuk Shahril Ridzuan yang akan melepaskan jawatan tersebut apabila kontrak beliau tamat kelak bagi menumpukan perhatian kepada usaha peribadi.

Lembaga Pengarah Khazanah (“Lembaga Pengarah”) mengalu-alukan pelantikan Dato’ Amirul dan yakin bahawa berdasarkan kepakaran dan pengalaman beliau, Khazanah akan terus maju dalam usaha menyampaikan mandat yang diberikan. Lembaga Pengarah turut menyampaikan penghargaan kepada Datuk Shahril atas jasa dan sumbangan beliau sepanjang berkhidmat sebagai Pengarah Urusan, terutamanya kejayaan beliau mengetuai pelaksanaan strategi yang telah menyaksikan Khazanah berada dalam kedudukan kukuh serta mampu mengharungi persekitaran yang serba mencabar akibat penularan pandemic Covid-19.

Dato’ Amirul, 51, adalah Ketua Pegawai Kewangan Kumpulan Malayan Banking Berhad (“Maybank”) sejak 1 Julai 2016. Beliau menyertai Maybank sebagai Ketua Kumpulan, Perbankan Global pada tahun 2014. Sebelum itu, beliau adalah Pengarah Urusan Kumpulan Chemical Company of Malaysia Berhad (“CCM”) dari tahun 2010 hingga 2014, dan telah bertanggungjawab dalam usaha penyusunan semula dan transformasi perniagaan syarikat tersenarai awam tersebut. Sebelum itu, Dato’ Amirul adalah Naib Presiden Eksekutif, Projek Khas di Permodalan Nasional Berhad (“PNB”) pada tahun 2010. Beliau pernah menjadi Pengarah Urusan, Ketua Perbankan Pelaburan di Maybank Investment Bank Berhad dari tahun 2008 hingga 2010, bilamana beliau bertanggungjawab atas bahagian perbankan pelaburan, kewangan korporat, pasaran modal ekuiti dan modal teroka. Beliau juga pernah berkhidmat sebagai Pengarah Eksekutif di Binafikir Sdn Bhd dan sebelum itu memegang beberapa jawatan peringkat pengurusan di Citigroup Global Markets (Asia) Ltd, Salomon Smith Barney, Schroders dan KPMG.

Dato’ Amirul adalah Ahli Perbankan Bertauliah Asian Institute of Chartered Bankers, Ahli Institut Akauntan Malaysia dan Felo Institute of Chartered Accountants England and Wales. Beliau berkelulusan Ijazah Sarjana Muda Sains dalam Ekonomi (Perakaunan dan Kewangan) daripada London School of Economics.

TAMAT



KHAZANAH
NASIONAL

Untuk sebarang maklumat lanjut, sila hubungi Mohd Raslan Md Sharif di talian Tel +603 2034 0000, atau e-mel raslan.sharif@khazanah.com.my.

Tentang Khazanah Nasional Berhad

Khazanah Nasional Berhad (“Khazanah”) adalah dana kekayaan berdaulat Malaysia yang diamanahkan untuk melabur bagi menghasilkan nilai mampan bagi rakyat Malaysia, melalui objektif komersial dan strategi yang berbeza. Objektif komersial Khazanah adalah untuk membangunkan aset kewangan serta mempelbagaikan sumber pendapatan untuk negara. Objektif strategiknya pula adalah untuk memegang aset strategik yang membawa hasil ekonomi jangka panjang. Khazanah dipandu oleh falsafah pelaburannya yang menekankan kepada pencapaian pulangan kewangan yang disesuaikan dengan risiko, menghasilkan pulangan yang mampan serta mengintegrasikan pertimbangan pelaburan yang beretika dan bertanggungjawab. Untuk maklumat lanjut mengenai Khazanah, sila layari www.khazanah.com.my.